

Kerwespruch

Extraausgabe



Fabian Schecker Spezial

Woann de Quetschekucheduft doi 10. kerb oileit,
doann waaßte jez' is es soweit
unn machst dich bereit,
fer doi letzt aktiv Kerwezeit!

Trage wird mer doann die golden Scherp
unn genießt noch emol e geile Kerb!

In moine 10 Joar hoann ich mit euch unn ehr mit mir...
...en Haafe erlebt unn doo devun kennt ehr lese genau hier!
10 Joar soin e mortz loang Zeit,
doo koann oam passiere so manch Peinlichkeit.

1. Streich (2011)

Damit mer all schee feiern kenne,
misse moi Buwe goanz schee renne.
Unn zu allem Iwwerfluss
mer jed Woch uff e Sitzung muss.

Woann die Sitzung doann zu End,
wird sicher net glei hoamgerennt.
So isses bei uns meistens üblich,
dass mer zusammehockt gemietlich.

Es folgt die kreative Phase
mit masseweiß Gedoankeblase.
Unn so manche Schnapsidee
reift im Hern so rischdisch schee.

So dachte sich unsern Fabian:
„Mir is so kalt, woas mach ich doann?
Entwerrer geh ich hoam ins Bett,
e Feiersche wär awwer aach goanz nett“

Er warf soin Vorschloach in die Runde,
e paar Mitstreiter woarn glei gefunde.
Unn weil e Feier drin net brennt,
sinn se gemeinsam losgerennt.

Ruck zuck unn mit goanz veel Stolz
klaute se unnerwegs noch Holz
So kame schließlich unser Noase
oo, uff em goanz heilische Roase.

Ehr liewe Leit, noch kennt ehr wette
es lag koan Wert uff Etiketete.
Doch wie ehr eich schun denke kennt
es Feiersche im Golfpark brennt.

Net nur die Stimmung war famos,
aach es Feier riesegroß.
Moi Buwe warn so rischdisch froh:
de Brachgrud brannte lichterloh.

Sie bliewe net loang unentdeckt
die Nochbern warn schun uffgeschreckt.
Die Polizei war aach schun da
mit Blaulicht und Tatütata.

Nun saaße se dort goanz gemietlich
unn eigentlich aach ziemlich friedlich,
de Spaß war allerdings vorbei,
verdeutlichte die Polizei.

Sie leerte noch goanz fix ihr Bier
unn musste direkt uffs Revier.
Dort hoan se kriegt fer diese Tat
e Stroof die sich gewäsche hoat!

Oans muss ich eich awwer loasse
ich hätt nix zu erzähle ohne eier Bosse!
Unn die Moral vun der Geschicht:
En Golfplatz unn Feier vertroche sich nicht.

Moin letzte Satz, doann her ich uff,
Stabführer, de Kerwemarsch jetzt druff!
All singe mit unn soin rischdisch froh
woanns haaßt: „Die Worfeller Kerb is do!“

2. Streich (2013)

Wen kennt oan jerrer hier im Ort
unn des net nur vum Kerwesport,
in de Feierwehr is er aach noch droi,
des koann joa nur de kloane Schecker soi.

Die junge Leit, die reise heit viel,
so aach de Fabi in soinem Scheckermobil.
Es is net mehr es Neijeste uff de Welt,
doch soacht er immer zu soiner Mudder „ach des hält“

In Lüneburg doo is es werklisch schee
drum fährt ein jerrer aach gern heh,
des dachte sich aach die Sabine unn ehr Faschingsfraue,
doch uffm Rückweg konnt'se ehrne Aache net traue.

Liege gebliwwe, unn in dausend Gedoange
sieht'se ehrn Bub sitze oan de Autobahnleitblanke.
Mit de Fraue hoam zufoarn, hatt er sich doann net geniert,
Dehoam ogekumme, wurd erst amol es Auto inspiziert.

Oan de Lichtmaschine hatts geleje
doch loang musst's Auto dehoam net rumsteje.
Unsern Fabian is ja aach net bescheiert
unn hatt soi Lichtmaschin glei emol erneiert.

Jetzt leefts Auto wirrer wie e präzise Uhr
unn de Fabi plant schun glei die nechste Tour.

E Paar Woche speerer, woas ne Reiselust,
es Scheckermobil doann nooch Berlin foarn musst.
Nadierlich is uffm Hoamweg ach hier wirrer woas passiert,
noch net loang gefoarn unn es Seitenfenster klirrt.

Zur Reperatur uff die Schnelle
verhalf e Plastikdutt vun de Tankstelle,
mim Kleweboard schnell festgebabbt,
hatt's mim hoamfahre doann doch noch grad so geklappt.

Die Moral vun der Geschicht:
Ins Scheckermobil setzt dich liewer nicht!
Domit ihr eich solch Maleure spart,
Fahrt besser alle Rad.

So wie ehr jetzt alle steht,
waas ich genau, dass net jerrer vun eich zu Fuße geht!
Manch oaner is aach mim Radel doo,
drumm stimme mer jez e Liedche oh.

„Ja, Mir soin mim Radel doo...“

3. Streich (2014)

Schun seit veele Jahrn
foarn e paar Worfeller Bube an die Lahn.
Erst woarns nur e paar vun de Feierwehr,
heit soins aach Fußballer, Kerweborsch unn noch mehr.

De Michl, de Schecker, unsern Rücker und Co.
woarn aach dies Joar wirrer doo.
Die Vorfreud war wie immer groß
unn freitags gings dann aach endlich los.

Moins wurd erst emol es Kanu mit em Haufe Bier belade,
denn ohne Bier koann mer so e Tour net starte.
Unser Grundnahrungsmittel muss reichlich vorhande soi,
drumm lade mehr liewer e paar zu veel enoi.

Uffm Fluss wurd doann weniger gepaddelt, mehr getrunke,
es dauerte net loang, doo woar es erste Boot aach schun gesunke.
Oan de Zielort hoann se es trotzdem all immer geschafft.
Kaum ausm Kanu raus, gings in die neechst Kneip mit de goanz Mannschaft.

Dort machte doann die Erste schlapp
unn legten ihre müden Körper uff ner Couch ab.
Die Couch stoand vor de Kneipedier
unn unsern kloanne Schecker dachte sich die is mir.

E korzeit sperrer gesellte sich de Rodeboier Steffen dazu
unn aach der verfiel dem Schlofe im nu.
Doo kame so zwoon Passante
unn sahe se lieje am Strassenrande.

Die Baade hoann doann die 112 gewählt,
sofort emol de Notarzt bestellt.
Der Notarzt beeilte sich zwar sehr,
als er endlich ogekumme, lag doo jedoch koanner mehr.

De Schecker unn de Steffen hoann sich groad entschlosse
jetzt wird erst emol noch e Bierche genosse.

De Notarzt machte a koa grosse Bosse,
unn hat die Stell aach gleich wirrer verloasse.

Es Missverständnis war glei uffgeklärt
unn hoat uns woas fer de Kerwespruch beschert,
doch loasst es eich e Lehre soi!
Schloft net uff de Gass, pennt lieber droi!

Ich muss hier als moi Stimmbänder quäle
unn soll doch noch en Streich erzähle
Mensch Beivadder! Schenk mer doch endlich emol e Schlückche oi
vun unserm gude Kerwewoi